

Altera Apologia pro

REGE CHRISTIANISSIMO
contra Cæsarianos, in qua de causis belli inter
Regem & Cæsarem recèns orti breuissimè & ve-
riissimè agitur.



LVTETIAE,

Apud Carolum Stephanum, Typographum Re-
gium, è regione scholæ Decretorum.


M. D. LII.

Cum priuilegio Regis.



Altera Apologia pro Rege

CHRISTIANISSIMO CONTRA
Cæsarianos, in qua de causis belli inter Regem
& Cæsarem recens orti breuissimè & verissimè
agitur.



STENDI superiore
Apologia Cæsariano-
rum in accusando Re-
ge leuitatem & impu-
dentiam, consctâq; ab
illis de re Turcica mē-
dacia tam multis per-
spicuisque rationibus
refutaui, vt cū æquis
rerum æstimatoribus,
tum omnibus veritatis studiosis abunde satisfac-
tum esse putem. Nunc eas causas explicare in-
stitui, quæ Regem in Cæsarem concitarunt, vt
quando nec fœderibus steterat, nec legibus ob-
temperarat, Rex animū ad arma cōuerteret, qui-
bus non solū dignitatem & existimationem
tueretur, sed suas, suorumque fortunas ab iniuria
vindicaret: eâq; conseruaret quæ alioqui ad præ-
dam & libidinem hostis acerrimi patebant, nisi
quammaturrimè eius conatibus obuiam itum

esset. In quo si docuero, Regem nihil vnquam aut spectasse magis, aut optasse potius, quàm publicam Christianorum tràquillitatem & pacem, multas etiam Cæsaris graues iniurias aut cõtemnendo oblitterasse, aut dissimulando præteriisse, magisque publicæ quietis, quàm priuati doloris, & læsæ existimationis rationem habuisse: cõtrà, si ostendero, Cæsarem & fœdera violasse, & tranquillitatem omnem interturbasse, eundem auctorem vnum & principem belli Parmensis, facemque incendii illius, quo nunc Italia, ac tota penè Europa flagrat, extitisse: insuper præclara illa religionis, iustitiæ, atque æquitatis nomina ad hunc vsque diem illum vsurpasse, vt his tantùm ad suam vtilitatem, & amplificandam, stabilien-
dàmque potètiā abuteretur, equidem in spem maximam adducor, & propemodum cõfido fore, vt Regis innocentissimi integritatem, & Cæsaris perfidiam homines agnoscant: & tandè aliquando intelligant, qua simulationis specie incredibilem dominandi cupiditatē, ac iniustos omnes conatus suos texerit. Quæ si, vt cupio, & rerum magnitudo postulat, accuratè exposuero, existimabo me Regē omni vel minima criminis suspicione liberasse, & cumulatè respōdisse ad impuros illos libellos qui per Germaniam, Italiam, aliàsque orbis terrarum prouincias à Cæsarianis disseminati sunt: ac tandem effecisse, vt leuissimi calumniarum artifices omnem posthac cõmen-

ris suis ac dictis fidem abrogatam intelligat: modo hæc quæ institui, æquis ac libentibus animis, perinde vt ea quæ nuper de re Turcica in mediũ attuli, accipiatur. Itaque cum Cæsariani dicendi exordium faciãt ab his quæ apud Insubres contigerũt, primũ de negotio Placentino agã, vt inde oratio mea proficiscatur, vnde hæc omnis causa belli Parmensis ducitur. Satis cõstat Placentiam, Parmãque iamdiu in ditione Romani Pontificis esse: nec Cæsar inficiari potest (vt de Maximiliano eius auo interea taceam) fœdus iniisse cum Leone decimo Pontifice Max. in quo receperat sanctissimè esse obseruaturum, diligentissimèque facturum, vti hæc duæ vrbes in fide Ecclesiæ Romanæ perpetuò cõseruarentur: quas etiam promiserat à Francis defendere, qui ex iure Ducatus Mediolanensis eas sibi asserabant. Igitur cum citra controuersiam iuris Ecclesiastici ac ditionis essent, compensatas cum aliis vr-bibus ac ditionibus Paulus tertius Pontif. Max. ea lege & conditione tradidit Petro Ludouico filio, eiusque posteris, vt eas beneficio sedis Apostolicæ possiderent. Hoc factum Cæsar non improbavit, cum alias ob causas, tũ maximè, quòd filiam naturalem Octauio Farnesio Petri filio in matrimonium collocauerat. His rebus sic compositis aliquo pòst tempore, anno M. D. X L I I I. secutum est fœdus Crecense inter Franciscum Regem & Cæsarem, in quo Pontifici Ro. sedique

Apostolicæ ita cautum est, vt nisi violata fide læ-
di ab vtrouis non potuerit. Itaque Cæsar Regis
amicitia confusus, animum ad bellum Germani-
cum appulit: in quo non dicam quantum adiu-
menti afflictis illius rebus auxilia pontificia attu-
lerint: nec quemadmodum auctis inde viribus, &
confirmato exercitu, bellū illud ex sententia pro-
pè cōfecerit, penes illos sit fides qui interfuerūt,
& in quantum discrimen Cæsar esset adductus, vi-
derunt. Illud certè Cæsar negare nō potest, quin
Farnesis plurimum debeat, cū propter copias,
quas maximis impensis in Italia coactas in mediā
vsque Germaniā duxerunt, tum quòd dubiis belli
casibus eandem cum illo fortunam subierunt.
Quænam autem beneuolentiæ remuneratio fe-
cuta est: aut quam talibus promeritis gratiam re-
tulit? Nempe cū nihil amplius ei opus esset ex-
ternis auxiliis ad persequēdas eius belli reliquias
circa annum M. D. XLVII. accidit vt Petrus
Ludouicus Dux Placentiæ, quorundam eius vr-
bis ciuium cōspiratione, & communicato prius
(vt verisimile est) cōsilio cum Ferdinando Gon-
zaga, Cæsaris apud Insubres legato, multò cru-
delissimè, multòque fœdissimè trucidaretur, di-
repta eodem impetu eius domo, ac Placentia Cæ-
sari dedita: ipse etiam Gonzaga, infesto exercitu,
fines ingressus, agri Parmensis arces, castellâq; ali-
quot vi occuparet, & bello oppidanos lacefferet,
quòd deditionē facere nollent. Ex quo iudicari

potest iam tum non solum occupanda Placétia, cuius tamen rei factum ciuium deditioe prætextitur, sed etiã petendis Parmensibus, qui nunquam à domino desciscere cogitauerant, initium belli mouendi ductum esse. Etenim his Cæsar arces aliquot & partem agri ademit, quæ omnia etiã nunc retinet: deinde inducias fecit, quæ nunquam patæ fuissent, si bellum non antecessisset. Quibus rebus cognitis, nemini poterat esse dubium, quin Rex iustam causam ueniendi ad arma propter fœdus violatum haberet, & ut Romanæ Ecclesiæ, quæ ab illa erant ablata, restitueret. Erat autem ad belladum eo tempore instructissimus: habebat sub signis magnum veteranorum peditum numerum, cum suorum, tum externorum qui sibi merebant, ex quibus, & ex equitatu, quem alit perpetuum, poterat magnum & fortissimum exercitum cogere: cumque primo quoque tempore, non sine certa spe victoriæ in Italiã immittere, præsertim cum Cæsar bello Germanico defessus & exhaustus, graui diuturnoque morbo affligeretur, ut magis de morte, quam de nouo bello suscipiendo, in quo superiores successus periclitaretur, cogitare deberet. Verum enim uero Rex, cui semper Christianorum tranquillitas prima fuit, his non est usus opportunitatibus: quod mallet quauis conditione potius, quam armis de iure publico disceptare, & putaret pro sua dignitate debere præsentem occasionem totius Europæ quieti dimittere: atque eo

magis, quòd persuasum haberet Cæsare religione
impeditù iri, ne in iniusta possessione rei Eccle-
siasticæ diutius maneret, cuius vbique patronù se
& vindicem profitetur. Præterea, nemo non cre-
debat, quin propter tantâ affinitatis coniunctio-
nem, quam cum Farnesiis habebat, esset in gra-
tiam filix, genero quod suum erat, redditurus.
Interea multis verbis vltro citròque de restituē-
da Placétia habitis, Cæsariani de sui principis vo-
luntate tam prolixè promittebant, vt Episcopus
Fanensis, Pontificis legatus, qui totum hoc nego-
tium procurabat, palam omnibus locis iactaret se
planè perspectum habere Cæsaris & sensum, &
animum de huius vrbis restitutione. Quæ tum
opinio hominem fefellit, & tandem (licet serò)
quantum differant inter se, præstare & polliceri
intellexit. Postquam Paulus Pontifex pro malè
collocato prius beneficio vidit hanc iniuriam si-
bi ac suæ familiæ fieri, & omni spe impetrandi
ablata, obstinatè sibi negari quod postulabat, ve-
ritus facilitatem suorum, & diffidens Cardinali-
bus nepotibus, ad quos amplissimus prouentus
ex sacerdotiis, quæ in Cæsaris ditione habebant,
quotannis redibat, ne Parma quoque amittere-
tur: hanc constituit præsidio firmare, præfecitque
ciuitati Camillum Ursinum cum iusta militum
manu, vt illam Ecclesiæ Romanæ nomine tue-
retur. His ita constitutis, Paulus Põtifex iam ex-
trema senectute grauis, & animi dolore confe-

ctus, moritur mandato prius dato (vt ferunt) de
Parma nepoti suo Octauio reddenda. Cui parere
Camillus distulit, vel quòd literis, quas Pontifex
iam animam agens scripsisse ferebatur, fidem nò
adderet : vel quòd illas extincto Pontifice rece-
pisset, & urbem successorì, quicunque is tandem
esset electus, conseruare constituisset. Cardinales
continuò Romam conuenerunt, & habitis Co-
mitiis agi cœptum de nouo Pontifice creando.
Nec Cæsar interim sibi defuit : sed quantum in
illo situm erat, enitebatur & contendebat, vt Par-
ma suæ fidei crederetur, quã sedi Apostolicæ ser-
uaret. Quod quanuis maximopere flagitaret, non
potuit obtinere. Enimvero id si fieret, Rex pro-
spiciens magno cum Ecclesiæ Romanæ detri-
mento futurũ, sua liberalitate & diligentia caue-
rat, vt qui urbẽ præsidio tenebãt, in ea custodien-
da vsque ad noui Põtificis creationẽ, cui in inte-
gro tota res esset, constanter perseverarent. Quæ
verò consecuta sunt, patent illa, in promptũque
sunt omnibus. Nam statim vt hic Iulius Ponti-
fex renuntiatus est, mandauit Parmam Octauio
Duci restitui. Quod & factum est, Rege haudqua-
quam reclamãte aut aduersante, licet in eam vr-
bem seruandã nullis sumptibus pepercisset, quòd
honestatem magis quàm vtilitatem spectaret : &
mallet eo beneficio Ecclesiam Romanam deuin-
ctam habere, quàm augendi adipiscẽdique com-
modi causa videri aliquid de possessione Eccle-

fiastica detraxisse. Paulo post nouus Pontifex non significauit modò, sed etiam declarauit Octauio, se nolle amplius stipendiũ, quod illi Parmæ tuenda nomine decreuerat, & menses aliquot exoluerat, vltra numerare. Qua re vehementer perculsus Octavius, qui in Pontifice omnem spem collocauerat, ibi tum exponere suã tenuitatem, postulare ne se desereret, & quantum mali, si destitueretur, inde impendêret. Quid multa? Nihil aliud æquissimis eius postulatis responsum, nisi vt vndecunque posset, præsidium peteret, id illi per Pontificem licere. Hæc porrò mutatio voluntatis, vt præter spem, & contra opinionem omnium accidit, sic non parum admirationis initio habuit. Atq; hoc etiam magis, quòd nulli nõ erat cognitum, quantum Pontifex Farnesiorum familiæ deberet, cui prima ac præcipua fortunæ, honoris, dignitatis incrementa & ornamenta accepta referebat: tum quòd videbant nobilem adolescentem in maximum periculum, & extremum penè discrimen adduci, si Cæsaris fidei sese credere cogeretur, quem tam iniquum in retinenda Placentia expertus esset. Itaque cum non solum huius adolescentis afflictæ fortuna multorum opes alliceret ad misericordiam, sed etiam maxima Ecclesiæ Romanæ res ageretur, Regii Legati, qui id tēporis Romæ erant, omni studio & diligentia cõtenderunt, vt Pontificem ad meliorem mentē reuocarent. Nec tamen aliud im-

petrarunt,quàm vt declararet id grati sibi,acceptumque fore, si Rex Parmam tuendam reciperet,modò id quidem sine ipsius interuentu fieret, vt Cæsaris,quem iratum habere noller, offensionem & inuidiam declinaret.Itaque cum videret Octavius,se in has angustias adductum, vt nihil à Pontifice sperare, à Cæsare tristia omnia expectare haberet,ad Regē confugere decreuit, egitq; suppliciter cum illo, vt Parmam, quæ ad se iure pertinebat, tuendam reciperet. Non potuit Rex pro insita animi bonitate atq; magnitudine adolescenti primario, præsertim iusta petenti, & honesta cupienti, negare: tum maximè, quòd eius postulata ad dignitatem Ecclesiæ Romanæ spectarent,cuius maiores sui omni memoria vindices,atque amplificatores fuissent: tum verò authores, vt Parma in ditionem atque potestatem Pontificum veniret.Quo magis sua intererat,ne à quoquam teneretur, nisi à Pontifice, aut ab eo qui se Pontificis clientem profiteretur. His Romæ cognitis, cum Pontifex sua se opinione deceptum videret,quòd Octavius tot,tantisque difficultatibus affectum atque afflictum, urbem Cæsari dediturum putauerat: adductus præterea ingentibus Cæsarianorum promissis,quibus iam planè hominem, eiusque affines beauerant, animum ad bellum conuertere, auxilium à Cæsare petere, delectus equitum atque peditum habere, denique Gonzagam ipsum in Parmenses mitte-

re, vt illorum ciuitatem obsideret. Regi cū
nuntiatum esset, Pontificem tāta ira prācipitem
ferri, quāta maxima post hominum memoriam
in sene sacerdote & Pontifice non est audita : il-
lum etiam toto animo, & studio omni in bellum
incumbere, curam ea persona, quā gereret, pror-
sus indignam, ne Mirandula Parmæ vicinior in-
terciperetur, hanc statuit auctiore præsidio con-
firmare. Itaque mandauit Brissaco Pedemon-
tii Præfecto, Legato suo, vt ex veteranis militi-
bus aliquot cohortes eo loci subsidio mitteret.
Hi viam ingressi, securè per fines Mediolanēsiū
sine iniuria & maleficio transibant, nihilque ho-
stile pacatis tranquillisque temporibus inter so-
cios atque fœderatos expectabant. At Ferdinan-
dus Gonzaga, cui nihil prius erat, quā facem ad
hanc belli materiam immittere, cuius primum
incendium perfacile poterat extingui, si æquis-
simis cōditionibus, quas Rex initio proponebat,
fuiſſet datus locus: illos dispalatos & necopinan-
tes adortus, cæpit. Et postquam aliquot diebus in
custodiam inclusisset, & quæstione habita nihil
comperisset quamobrem in eiusmodi homines
publicè animaduerneret, alios secretò trucidauit,
alios demersit, alios ad triremes dānauit, omnē
que in illis crudelitatem suam & inhumanitatem
deprompsit. Nec contentus his, cū delecto exer-
citu profectus, Mirandulam circumuallauit. In
qua obsidione quid commiserit, quid egerit, ni-

hil dicam,quòd compertum habeã,rem omnem
in oculis,auribus,& recenti omnium hominum
memoria versari. Proinde, Rex cùm videret non
solùm amicos Parmæ obsessos,quos honestè de-
serere non poterat, sed etiam aperto Marte Mi-
randulam impeti, quam semper suam duxisset,
quàmque non minore cura tueri, quàm cæteras
auitæ,patriæque hæreditatis vrbes veller,id quod
apud Cæsarem testatum sæpenumero reliquerat,
necessariò ad arma venire coactus est,vt iniurias,
quas bello iam minimè dubio hostes inferebant,
propulsaret, & vlcisceretur. Ex quo fonte flu-
xerunt quæ pòst,terra & mari vtrinq; gesta sunt.
Hæc, sicut exposui breuiter & dilucidè, remotis
verborum calamistris,ne orationi fides detrahe-
retur, si nimis elaborata, nimisque ornata ap-
pareret, ita prorsus se habent, quæ & orbis terræ
iudicio comprobantur,& patent ex publicis actis
Senatus Pontificii, & omnium Legatorum, qui
vbique gentium id temporis fuerunt, literis ac
memoria teste commendantur. Quinetiam Cæ-
sar inficiari non potest, hæc eadem intellexisse
ex oratione Legati Regii, qui tum apud eum age-
bat. Hic precibus omnibus principem eum de
proposito susceptoque consilio depellere quàm
sæpissimè conatus est, cùm diceret, quicquid à
Rege de negotio Parmensi tentatum esset, id so-
lùm tuendi patrimonii Ecclesiastici causa esse fa-
ctum: nihil aliud spectasse, id liquidò confirmari

ex eo subsidio, quod Parmensibus in interregno Pontificio miserat: præterea addebat, per Regem licuisse Octauio statuere quid faciendum putaret de ea vrbe, modo ne interuerteretur, & ad alium, quàm ad Pontificē, aut Ecclesiæ Romanæ clientes, vt nuper de Placentiâ acciderat, trāsferretur. Itaque mirari satis nō possum, quid causæ fuerit, cur hanc iustissimā Parmæ propugnationē Cæsar improbaret, cum de Placētia ab eo per vim, p̄rque summam iniquitatem occupata nemo exposlaret. Neque enim violāti fœdera, & possessiones Ecclesiasticas vsurpāti, arma inferre propositum fuerat, sed satis erat nimix hominis ambitioni tanquam fr̄nōs inijicere, ne longius euagaretur, neue Parmam inuaderet, quam omnibus precibus, omni cura, opera, diligentia, gratia sibi vindicare contēdebat. Ego verò illos qui iussu Pontificis id factum dicunt, & excusant quòd Cæsar filius obsequentiissimus patri Sanctissimo auxiliū aduersus illos, qui ab eo defecerāt, negare non potuerit: orabo, atque obsecrabo, vt si incorruptè iudicare voluerint, rē per se sine amore & sine cupiditate, & rursus sine odio & sine liuore candidè expendant. Nam si ad defectionem Octauii respiciāt, proculdubio reperient tantū cedere vrbe sua Cæsari noluisse. Quòd si obiiciant, ad Regem transfugisse: respondeo id Pontificis voluntate factum, qui huic facultatem opis à quocunque implorandæ fecerat, eoque adolescentem

difficultatis, atque desperationis redegerat, vt ab omnibus exclusus, ad solum Regem perfugere potuerit. Præterea quænam aut diuina aut humana lex clientem defectionis damnauerit, qui nihil contra fidem, quam Principi suo præstare tenetur, aut molitus fuerit occultè, aut pepigerit aperte? Quod si quis Octauium aliter fecisse contendat, aut à Rege alia conditione in fidem receptum, iam ipse probet, aut finem tandem calumniandi faciat. Nam quod Cæsariani obloquuntur, nullum studii aut obseruatiæ officium ab Octauio in Regem prius fuisse profectum, sed ipsi Cæsari addictum, deditum, affinitate obstrictum: nã illi dum obrectare volunt, summis laudibus Regem ad cælum euehunt: qui misericordia ductus, tuendum suscepit adolescentem primarium, desertum ab iis, quorum opibus sustentandus erat, & præstiterit id quod ii qui eum oppugnant, cum iure affinitatis, tum ipsius merito & suorum præstare debuerant. Nec enim audiendi sunt, qui negant quenquam ab alio iuari oportere, de quo non sit prius benemeritus, vt non incundam, sed tantum referendam gratiam putent. Quo vno splendor benignitatis, vis amicitiae, societatis humanæ prima coniunctio tolleretur. Quin potius in principe hoc maxime officii iudicandum, vt quisque sociorum aut amicorum maxime opis egeat, etiam si nondum profuerit, aut nunquam sit profuturus, ita ei po-

tiſſimum opitulari. Hoc clariſſimi reges atque Imperatores, hoc potentiſſimi populi quondam fecerunt, quorum res geſtæ atque virtutes iſdem quibus ſolis ambitus regionibus ac terminis cō-
tinentur. Hoc Aſſyrii, hoc Perſæ, hoc Macedo-
nes, & Romani omnium gentium literis ac lin-
guis celebrati, qui terra & mari longè latèque
rerum potiti ſunt. Hoc denique Reges Franci
ſecuti ſunt, qui imperiū beneficiis magis, quàm
armis retinendum ſemper putauerunt, qui bella
potiſſimum in gratiam illorum ſuſceperunt, qui
iniurioſius tractari ad ſe confugerant. Itaque
cū Octavius peteret, vt ſe quoque ſicut cate-
ros, dignum Rex exiſtimaret, cuius ſalutem de-
fenderet, non potuit eius iniurias negligere. Re-
cordabatur idem fuiſſe factum ſuperiore memo-
ria in Duce Ferrarienſi. Ex hac vna re maximam
laudem cæpiſſe maiores ſuos, quòd ſocios æqui-
tate & fide defendiſſent. Sic belli vtilitatem, ſic
pacis dignitatem, ſic regni gloriam præclare ſu-
ſtineri arbitrabantur. Nā quos ab imminentibus
periculis liberauerant, non per vim retinendos
ædificandis, aut occupandis, ſtruendiſve arcibus
putauerunt: quod Florentiæ, Senis, & aliis locis
aliter Caſarem conſtituiſſe videmus. Nō virtutis
ſuæ præmiū & fructum aliorum ſeruitutem, ſed
gloriam, quam ex rebus bene geſtis referrent, ſpe-
ctauerunt: nec aliam laborū remunerationem
quaſierunt, niſi vt qui beneficium accepiſſent, ſi
modo

modò beneficio digni essent, memoria tenerét. Itaque effecerunt, vt regnum Franciæ, afflictorum exterorum perfugium, & patrocinium orbis Christiani verius quàm imperiũ nominari posset. Qui igitur Regem culpæ arguūt, quòd Octauium hominem de se nunquam benemeritum in fidem receperit, hi mediussidius apertè probant ignotum à Rege Franco maiorem iniisse gratiam, quàm generum à socero, & clientem à patrono: quem propter magna in se merita & amare maximè, & iuuare plurimum debuerat. Porro autem cùm Pontifex Cæsarem vellet, iuberet Octauium bello persequi, hoc videbatur durius agere, quòd non in eo euigilabat, vt Placentiam reciperet, quæ vi retinebatur, sed vt Parmã quoque colore quæsito Cæsari miciparet. Quo magis Cæsar reprehendendus, qui Pontifici perniciofa, & iniusta iubenti obtemperarit: præsertim cùm illa omnia eò spectasse constet, vt non solùm Placētia potiretur, quam præter æquum & honestum interceperat: sed vt Parmam quoque in potestatem redigeret, & propter egregia illa merita, quæ tam rationibus suis consentiebant, quàm Ecclesiæ Romanæ incommodabant, aliquândo partem prædæ ad Pontificis nepotes trãfferet: sic oportere hanc quoque familiam ornari, & ex ruinis aliorum crescere. Atque vt id Pontifex assequeretur, mandabat Cæsari, non vt arma Turcis inferret, alioqui insensissimis Chri-

stianæ religionis hostibus, quorum vires magis ac magis quotidie augetur magno Reipublicæ Christianæ incommodo, sed maximo & præcipuo Regis Romani Cæsaris fratris malo, qui primus propter propinquitatem impetus eos sustinet, sed ut familiæ Farnesiorū exitiū pararet, quorum opibus & gratia creuerat. Atque ut hæc celerius succederet, iubebat sanctissimus Pater initiū belli ab agro Parmensi vexando duci, ut miseri illi, qui propter inopiam & caritatē annonæ superioris, extremam propè famem tolerauerāt, longè tristiora expectarent, dum frumenta sua & reliquas fruges, quæ iam maturescere incipiebant, corrumpi, omne pecus abigi, pagos exuri, agros vastari, spem omnem misericordiæ præcidi viderent. Noluit interea clemētissimus Pontifex illos statim ferro absumi, sed paulatim fame intabescere, ut bona, fortunas, coniuges, liberos rapi, fana atque domos spoliari prius cernerent, quàm propera morte tantas calamitates anteverterent. Quæ tamen omnia non ob causam aliam perferebant, nisi quod sub ditione Ecclesiastica viuerent, ei que Principi parerent, quem à Pontifice acceperant. Hæc est beatissimi Papæ humanitas, hæc clementia, hoc officium Patris sanctissimi, summi religionis antistitis: cuius omnes actiones, omnia studia, atque consilia ad pacem & cōcordiam, non ad bellum atque ad arma spectare debuerāt. Ad cōn' tanta iracūdia præ-

capitem ferri, vt propter cupiditatem priuatam
conciliū publicum Christianorū, (vnum com-
ponendis his cōtrouersis, quæ nostra memoria
in religionem irruerunt, aptum remediū) quod
ille paulo antè indixerat, & cōuocauerat, inter-
turbaret. Quidē sanctissimus ille Pontifex com-
mittit inter se Principes Christianos, quos, vt pa-
rens filios, conciliare debuerat: concitat Cæsarem
maximū natū filium in Regem fratrem, vt bel-
lum populationibus & incendiis hostiliter in-
choet, in eoque inchoādo barbarorum omnium
crudelitatem & immanitatem superet, præfer-
tim eo tempore, quo spes sarcindæ concordix,
ac incundæ pacis nondum exciderat. Nam cū
Pōtifex Ascanium Corneum sororis filium cum
mandatis ad Regem misisset, tametsi ille fuerat
& libenter acceptus & auditus, ea tamen fuit im-
potentia animi, vt nec eius reditum præstolari,
nec Monlucii aduētum expectare vellet: tametsi
magnis, diurnis, ac nocturnis itineribus Romam
contendebat, vt Pontificem de Regis voluntate
certiorem redderet: quin potius exercitum con-
scriptū in agrum Parmensem immisit, vt omnia
igne ferroque fœdaret. Sic enim existimauit
fore, vt Rex, qui nihil magis quàm quietē Italiæ,
pacē prouinciārū, salutem orbis Christiani pro-
curabat, hoc factō vehemētius commotus, spem
omnem concordix deponeret. Possem in hanc
sententiam plura dicere, sed vereor vt hæc quo-

que nimis multa esse videantur . Nam de tantis rebus neque satis grauitè disputare, neque satis commodè licet exposulare. Itaque continerem meipse à dicendo perlibenter, nisi animaduertērem Cæsarianos, vt factum Placentinum excusent, multa proponere . Imprimis omnem eius tempestatis causam conferre in sceleratam Petri Lodoici Farnesii vitam, qui urbem prius tenebat, contendere illam ditionis Imperatoriæ fuisse: deinde testatam proferre Cæsaris voluntatem, qui recēns declararit se non laborare de Parma, modò ad Pontificem rediret: tum ingratos criminari Farnesios in ipsum Cæsarem, non fuisse ab officio discessuros, non Cæsaris gratiam repudiaturus, si beneficia illius in se, si plenas amicæ voluntatis & voces, & cohortationes satis attendissent, Pontificemque audissent, cū de compensatione Parmæ ageretur, illum loco Parmæ proposuisse Ducatum Camerinum, præfecturam urbis nouæ, & octona milia nummū aureorum in singulos annos, post proferre in medium sententias aduersus Octauium vt contumacem, nec dicto audientem latas, quarum executio Cæsari mandata . Tum ad extremum quæ rationes secundum ea Cæsarem adhortatæ fuissent, quare iuuādum armis Pontificem duceret in causa publica, non Pontificis solūm, sed etiam totius Italix . Quibus ex rebus iudicari posse, nihil fuisse causæ quamobrem Rex urbis à se longissimè dis-

iuncta propugnationem sibi cogitandam , & tantis sumptibus suscipiendam putaret, vt Asylum totius Italix exulibus tantum aperiret. Ita dum Cæsarem & Pontificem de negotio Placentino purgant, Regis famam apertè lādere conātur, & Octaviū sicuti perduellionis reum omnium sentētiis damnari postulant: siquidem iudices tam promptos & paratos ad damnādum, quā ipsi ad criminandum expediti sunt, nanciscerentur. Hæc sunt ferè argumenta, quæ ubiq; gentium crebrò ab inimicis Regiis, ab improbis sæpe iactantur, & in falsa criminatione publicè etiam paulò antè à Cæsarianis proposita sunt, quæ mihi ordine confutanda videntur. Ita facillimè quæ res sint inter maximos Principes controuersæ, & ab vtra parte stet ius æquūque, intelligetur. Primum, quod ad Petrum Ludouicū attinet, si talis fuisset, qualē Cæsariani criminantur, (nam alioqui non est propositū vt mortui manes interpellem) equidem miror tantum Imperatorem, tam pium, tamque iustum, qualis vult haberi, sese tam arcta affinitate coniunxisse cum homine, vt sui prædicat, omnibus vitiis inquinato: nisi fortè suspicemur hoc consilio factum, vt tantisper eo vteretur, dum vtilem suis rationibus putaret: post tolleret è medio, quoties sibi collibuisse. Verum esto, tam malè fuerit de suis ciuibus meritis, vt de eo interficiendo coniurarint: quis Cæsarem eius criminis, de quo

quæstio nulla haberetur, iudicem constituit? Cur
nondum sententia dicta rem ad executionem de-
duxit? Cur in hæreditatem mortui, quæ ad gene-
rū iure redibat, inuolauit? Deinde, quis tam cæ-
cus, ut non videat, aut tam stupidus, & rudis re-
rum, ut non intelligat hæc omnia à Cæsarianis
procurata, prouisa, & deliberata? Placentini Pe-
trum Ludouicum impetunt, obtruncant. Ferdi-
nandus inter hos tumultus urbem adortus, in so-
cietatem prædæ sese offert: oppidani deditionem
faciunt. Omnia agri Placentini castella armis &
militibus Cæsarianis cōplentur: nonnulla etiam
in Parmensium finibus expugnantur: & tamē,
quod supra attigimus, Parmenses nunquam ad-
duci potuerunt, ut à domino deficerent: sicuti
nec Placentini ante eam cædem perpetratam,
vllam defectionis significationem dederant. At
Ferdinandus Gonzaga ut hoc factum clementien-
do adumbraret, homo sapiens, & alta quadam
mente præditus, voluit probare rudioribus, & qui
propius eum non nouerant, innocentiam suam
atque integritatem. Voluit eorum criminum,
quorum antehac insimulatus fuerat, cum in Gal-
liis, tum Romæ, & alibi gentium suspicionem
dimouere: voluit notā, quæ suo nomini ex eius-
cemodi accusationibus ad sempiternam igno-
miniam est iniusta, eluere. Deinde cum pacis pu-
blicæ commoda priuatis necessitudinibus ab in-
eunte ætate potiora habuerit, nihil minus labo-

rarit, quàm de re amplificanda, maluerit semper
de suo largiri, quàm alienū rapere: ad extremum,
non potuisse adeò sui obliuisci, vt in gratiā Cæ-
sar̃is, & quærendi sui commodi causa, Duci Pla-
centino, eiūsq̃ fortunis insidiaretur: tantūm
spectasse, vt in subito rerum nouarum motu vr-
bem præsidio retineret, de qua postea Cæsar ex
sentētia & arbitrio statueret. In quo si dum ope-
ram Principi suo diligentius nauat, aliquid of-
fensum secus ac oportuit, præter naturam id qui-
dem, ac certè contra consuetudinem: hoc iustio-
rem mereri veniā, quòd in cæteris quæ adhuc
egisset, conscientia optimæ mentis niteretur,
nec vllius culpæ affinis reperiri posset. Sed vt-
cunque sit, videntur omnes Principes Christiani,
qui Ferdinandum vel de facie, vel de nomine
& fama nouerunt. Quāobrem, vt ad rem redea-
mus, vnum lubēs ex Cæsarianis sciscitarer: nēpe
si Cæsar non debuit oblatam à legato Placētiam
repudiare, quo tamen iure urbem retinere hoc
tēpore conetur, quam ipse, suiq̃ maiores semper
ascripserunt, attribueruntq̃ Pōtificibus, & omni
studio & viribus contēderunt, vt in ditionem Ec-
clesiasticam redigeretur, quotiescunque aut alie-
nata ab ea, aut esset erepta? An ignorat fœdus
quod An. M. D. XI. Iulius secundus Pontifex
maximus, Maximilianus Cæsar, Rex Hispania-
rum, cognomento catholicus, & Veneti inter se
inierunt, quo sancitum est vt armis oppida Ec-



clesiasticæ ditionis repeteretur, quæ tum à Francis tenebantur. Cùmque ex eo fœdere Placentiam & Parmam recepiſſent, Iulio reſtituerunt, quarum poſtea, quoad vixit, potitus eſt. Eo mortuo, Dux Mediolanenſis qui ambas occupauerat, Leoni decimo qui ſucceſſit, ſtatim vt audiuit Pontificem renuntiatum, reſtituit. An poteſt & aliud fœdus inſiciari, quod ſeparatim anno M. D. x v. Maximilianus cum Leone fecit: & quemadmodum Cæſar ſua cõfirmatione recepit curaturum, vti Parma & Placentia Eccleſiæ Romanæ redderentur: quarum etiam nomine Pontificem in fidem eſſet accepturus. Quocirca ſecũdum id fœdus Pontifex Cæſaris beneficio vtramque urbem ſine controuerſia vſque ad Franciſci Regis Principatum poſſedit. Exinde cùm Franciſcus Rex poſt victoriam Marignanam, Parmam & Placentiam cepiſſet, Cæſar maiores ſuos ipſorum veſtigiis perſecutus, in inuidiam Regis fœdus cum Leone x. Anno M. D. x x i. renouauit, in quo nominatim cautum de vtraque vrbe recuperanda. Quod & factum eſt, ſic vt triginta plus minus annos vſque ad acerbiffimum Petri Ludouici interitum Eccleſia Romana poſſederit. Nec verò prætereundum arbitror quemadmodũ Pontifex Cæſare poſtulante illos execrationibus publicis deuinciendos, & impiorum numero habendos indicauit, quicunque poſſeſſiones Eccleſiaſticas occuparent, quæue Parmam & Placentiam
ad ſedem

ad sedem Apostolicam negarent pertinere. Quis igitur non miretur vnde Cæsar adduci poruerit, vt contra factum aui sui; & beneficium ab illo concessum, contra fidem datam, contra iusiurandum, atque adeo contra seuerissimam Pontificis sententiam, quam ipse in alienos rerû Ecclesiasticarum possessores ferri voluerat, Placentiam per vim retineat, & in Parmâ omnes machinas adhibeat, dirisq; illis quas in alios pronûtiari curauerat, sese deuoueat? Interea tamen vbique dici & haberi velit primûm vindex religionis, deinde conseruator sedis Apostolicæ, postremò etiâ defensor Pontificum. Præterea alia, quæ in hac rem à legatis & internuntiis Pontificis cum Cæsare dicta & acta sunt Anno M. D. X L I X. quibus non est assensus. Tantûm ex sententia cuiusdam theologi Hispani sodalis dominicani, quem tum habebat omniû arcanorum cõscium & moderatorem, responsum: quòd cum ius Placentiæ esset controuersum, in dubiis causam possidentis videri meliorẽ: atque ita posse, dum amplior huiusce rei disceptatio haberetur, (quæ ad Calendas fortasse Græcas fiet) urbem Placentiam sine scrupulo & labe conscientiæ retinere. Ita visum est venerabili theologo leges diuinas ex formula forensi interpretari & illudere, vt hoc commento Cæsarem suum omni culpa liberaret. Miror igitur cur Cæsar grauissimi theologi sententia absolutus, alias retinendæ Placetiæ causas præ-

texat, ac dicat se restitutionem vrbs in aliud tempus distulisse, quòd scilicet videret Paulum Pontificem à Placentinis auersissimo esse animo, & ab illis ob eandem filii pœnas maximopere expectare: se prospexisse, si vrbs in potestatem illius recideret, quanto id detrimento oppidanorum foret, qui de eo facinore omnes ad vnum idem consensissent. Quæ ratio si apud eum viuo Pontifice Paulo valuit, cur illo mortuo urbem Iulio successor non reddidit, à quo Placentinis nihil mali impendebat? Cuius & integerrimi temperantiam, & iustissimi hominis fidem, & vnus post homines natos sanctissimi Pontificis integritatem vbique terrarum celebrat. At quis non videt, Cæsarem non solum de retinenda Placentia, sed etiam de inuadenda Parma, iam inde ab initio cogitasse? Quis non audit, quàm apertam animi significationem dederit, dum Camillo Ursino, qui urbem, mortuo Pontifice, præsidio retinebat, grauissimè minaretur, atque cum Venetis ageret, ne commeatu Parmenses iuuarent? Quinetiam, hoc Pontifice renuntiato, eius internuntii, qui apud Cæsarem agebant, sæpe declararunt, hanc fuisse Cæsaris mentem, vt Parmam sibi quouis pacto adiungeret: præcipue verò Episcopus Fanensis, cum esset allatum de Octauio à Rege in fidem recepto, palàm Augusti in conuiuio testatus est, idcirco Parmam Cæsari ereptam, quòd in ea licitanda & mercan-

da nimium diu cunctatus esset : perinde quasi significaret, Cæsarem, si initio æquioribus conditionibus egisset, potuisse urbem non magno pretio redimere. Non modò igitur nihil prodest, sed etiam obest Cæsari, quòd chirographo declararit, se Parmam Ecclesiæ Romanæ velle dimittere, ac nolle in eius possessione Póntificem vltra interpellare. Etenim hæc voluntatis illius declaratio non prius est audita, quàm conuenit inter ipsum & Pontificem de Parma ab Oëtauiio repetenda. Itaque cum Cæsar se de eo purgatum cuperet, quòd tantopere eam urbem appetiuisset, & suspiciones occupandæ totius Italiæ, in quas principibus omnibus eius prouinciæ venerat, dimouere vellet, declarauit sibi satis esse, si Parma ad Pontificem rediret. Serò illud quidem, ac certè postquam còsilia recuperandæ vrbs, quæ cøperat, minus succedere animaduertit. Quòd si aliquando id est ab eo promissum, & non repræsentatum: si fœdus violatum, quod iurauerat: deniq; si Placētix restitutioni consensit, quā nunc contra fidem, contra iusiurádum, contra beneficium aui sui Maximiliani retinet, quid facturum fuisse credas, vbi sub hac inani simulationis specie urbem sibi ascripsisset: Quis putet defuturas illi rationes, quibus se iure eā possidere probaret: Eoq; magis, quòd illa sua declaratione saluum ius imperii esse voluit: Quo fit vt Parmam adeptus, faciliè in integrum restitui postularet, si quid con-

d.ii.

tra ius Imperii promississet : præsertim cùm is sit, qui aliis det leges, ipse non accipiat : nec credibile sit illi defuturum fraterculum arcanorum conscium, qui in dubiis iustiorẽ possessoris causam persuadeat. Quare nec Cæsar causam suam vana illa declaratione probare, nec Pontifex eo nomine Octauium dānare potest, quòd æquissimas dirimendæ controuersix conditiones non admiserit: siquidem Cæsar hanc sui sensus significationem non prius, quàm recepto in fidem regiam Octauio, declarauit, quàmqu; omni spe potiundæ vrbis excidisset. Atque haud scio an id potissimum fecerit, vt se inuidia, quam maximam apud omneis principes conflauerat, quòd possessionibus Ecclesiasticis inhiaret, aliquo tandem modo expurgaret. Pontifex quoque cùm diris, fulminibus, & id genus terriculis Octauium ab instituto reuocare non posset, tū amicas illas voces, Sirenū cantus non absimiles emisit: vt quem minis ad se trahere non potuerat, saltem precibus & pollicitis deceptum in sententiam adduceret: ac demum suam existimationem tam integram in liberanda fide præstaret, quàm in exoluendo, quod in præsidium Parmæ prius constituerat, stipèdio præstiterat. Cùm igitur Octauius Iulium Põtificem initio Põtificatus, quo tempore sibi maximè propitium existimabat, tam alienum sit expertus, haudquaquā debuit illi in gratiam Cæsar's omnia sibi aduersa molienti, & tan-

roperare irato auscultare. Porro autem dum Cæsariani Regem leuitatis & imprudētiz accusant, qui Parmam à Francorum finibus longius disunctam tantis sumptibus tuendam suscepit, Farnesiosque sibi parum vtilis, & opibus iuuandos, & in regiam affinitatem vocandos putauerit, equidem existimo illos ex sui Cæsaris ingenio & moribus alios spectare: quem dum vident amicitias & societates ex cōmodo potius, quàm ex honestate probare, nullius patrocinium, nisi id suis rationibus expediat, suscipere: Regem ad bene merendum de hominibus promptiorem, quod contra naturam & præter consuetudinem Cæsaris id faciat, inconsultius agere vociferantur. Sed Reges Franci iam inde ab initio regni longè diuersam regnandi viam sibi proposuerunt. Igitur nihil nisi quod honestū esset, aut admirantes, aut expectētes, omnia virtuti suæ peruia fecerūt: nullum bellum quātumuis longinquum & difficile refugerunt: non labores, non sumptus insolitos reformidarunt, dum laudem inde & gloriam adipiscerentur. Socios & amicos coluerunt, non illos, quorum opibus potentiores essent, sed quibus iuuandis clariores euaderent. Sæpenumero nullis precibus euocati, afflictis occurrerūt, non beneficia fœnerātes, nec gratiam ab his quos defendissent, aliam exigētes, quàm vt grati & memores in pace & otio viuerent. Testes huius fortitudinis & liberalitatis nostræ omnes exteræ na-

tiones, omnes oræ atque maria : Testes Romani Pontifices : Testes tot Italix Principes , tot olim Pannoniæ, Græciæ, Hispaniæ, Angliæ & Germaniæ, propugnaculis Regni huius ab iniuria defensi : Testis Iudæa & Syria, ad quam liberandam ab Oceano terrarumque vltimis oris ingentibus equitum peditumq; copiis profecti , prouinciam ex Barbarorum faucibus eripuerunt . Nec verò propositum est hoc loco , Francorum singulas expeditiones, vel bellorum omnia genera recensere, nedum illorum præclare res gestas commemorare : quæ cum sint innumerabiles , tum illæ quidem nō solū nostris, sed penè omniū gentiū literis atque linguis celebrātur. Quāobrem, vt ad Cæsarianos redeam, cum ponderibus vtilitatis honestatem examināt, mihi quidem illi videntur velle suum Cæsarem excusare, quod fratrem alioqui per se parum potentem Turcis opposuerit atque obiecerit : qui tamen cum illis, quotidianis ferè præliis contendit, dum aut reliquam Pannoniā inuadunt, aut clientes suos cum liberis & vxoribus in teterrimam seruitutem abducunt , Cæsar vires suas in illos non conuertit: quod intelligat quanto periculo cū illis, & quā minima spe commodi augendi armis disceptaretur. Rex autem qui se his maioribus, quos modò commemorauī, natum recordaretur, non potuit Octauium, & indigna patientem, & supplicē negligere. Imprimis, quod oppressum ab his,

à quibus debuerat iuari, videbat : deinde quòd
intelligebat Parmā, quæ in ditione Ecclesiæ Ro-
manæ iādiu tenebatur, ab alienis intercipi, quod
sibi non ferendum arbitrabatur. Iam verò cuius
est stultitiæ mentionē facere illius affinitatis, qua
Rex Horatiū, Octauii fratrem, sibi deuincire vo-
luit : An ignorant, Francisko Rege adhuc viuo,
primū de ea re agi cœptū : deinde post initum
à se Regnum pactam & confirmatam, cum ne-
mo id tēporis de Parma cogitaret, necdum Pla-
cētia esset occupata : Qui igitur id Regis factum
rēprehendunt, tantū abest ne Regem vitupe-
rent, vt magis laudare non possint : qui cū flo-
rentibus Farnesiorū rebus filiam naturalem Ho-
ratio despondisset, post interitum Pauli Pontifi-
cis, inclinata ac propè iacente eius familiæ fortu-
na, nihilominus fidē liberare decreuerit. Sed, ne
cui mirum esse videatur, tandiu me his dispu-
tandis hāsisse, petam ab illis, in quorum manus
hæc scripta peruenient, hanc mihi veniam dari,
accommodatam magnitudini rerum, & accusa-
tioni aduersariorum, qui cū causæ diffiderent,
& multitudine ac varietate argumentorum tene-
bras veritati obducere conarentur, necesse habui
accuratius ad singula respondere, vt tandem o-
mni errore sublato tantæ controuersię intelli-
gi possent. Reliquum est, vt Mirandulam, quo-
niam de ea quoque Cæsariani loquuntur, non
nomine solū honestiore, sed vetustiore etiam

causa, quàm Parmam à Rege tutandam ostendamus. Hanc enim non nunc primum sibi adiunxit, quod aduersarii de Parma criminantur, sed à patre iure hæreditario delatam accepit, qui quoad vixit, nihil prætermisit, quod ad eam retinendam pertineret. Nam eo tempore quo conuentus Regum ad Niczam de induciis habitus est, cum Paulus Pontifex de ea quoque controuersia sumptus esset arbiter, Mirandulam Regi possidendam adiudicauit: vt vel ipse, vel alius quiuis ipsius nomine atque mandato teneret. Quam quidem arbitri sententiam comprobauerunt aduocati & cognitores non solum Galeotti Pici, tum Comitum Mirandulani, sed etiam Ioannis Thomæ, cuius patrem Mirandulæ oberuncatum esse Cæsariani criminantur: ambo enim de illius oppidi iure contendebant. Hoc insuper additum est, vt reiecta criminis accusatione, integra sui iuris persecutio Ioanni Thomæ relinqueretur: in qua actione, à Francisco Rege iuris & æqui obseruantissimo nunquam est interpellatus. Ex contrario Cæsar, cuius sunt primæ partes, vt suum cuique tribuatur, præter omnem iuris scripti rationem ab executione progressus, armis deturbare illos de oppido contendit, qui nomine Regis possident, nulla disquisitione prius facta, aut sententia pronuntiata: Quodque iniurius est, vt litigatoribus omnem disceptandi de possessione facultatem in futurum adimat, oppidum

oppidum sibi vindicare conatur. Quemadmodum fecisse legimus Romanum illum Quintum Fabium Labeonem, qui cum arbiter Nolanis & Neapolitanis de finibus à Senatu datus esset, agrum controuersum populo Romano adiudicauit. Atenim Mirandula imperii clientela est. An si ita esset, id obstaret quo minus Rex Francorum oppidum beneficio imperii possideret? An etià obstaret quominus in fidē reciperet, quod de Tullo & Vertoduno in Lothoringia, aliisque urbibus non paucis, quas nihil necesse habeo hoc loco commemorare, factū videmus? Constat enim illas iandiu in fide Francorum Regum esse, qui tamen ius imperii semper saluum esse voluerunt. Nunc itaque Cæsar perpetuò augustus, in conseruanda imperii ditione tā religiosus, Cameracū, Traiectū, Frisiam imperio eripuit, ut sibi ac suis priuatim ascriberet: atq; ut Mirandulam occupet, omnes machinas adhibet, ut ius scilicet Imperii sanctum tectum atque integrum permaneat. Quod ut facilius assequatur, Comiti Mirandulano non fuisse cautum fœdere Crecēsi, neque illum huic ascriptum obiicit. Quid si nec fuit exceptus? Quanquam ea parte satis cautum esse contendere possum, qua vtriusque principis amicis, sociis & fœderatis prospectum est: qua omnes vtrinque sublata sunt controuersia. Iam verò quid est quod res omnes, quarum possessio ab induciis Nicæis bello turbata fuerat, repeti

reddique sanctissimo fœdere cautum, nisi omnia in eum statum restitui, quo fuerât, dum induciæ fierent: Ex quo efficitur, Regem posse iure optimo Mirandulam retinere, non solum ex illis induciis, sed etiam ex fœdere Crecenti: quo ita confirmatæ videntur, vt induciæ, quæ ad tempus pactæ erant, vim fœderis perpetui habere cœperint. Præterea, quanuis hæc ratio, quæ tamen firmissima est, non tantopere vrgeret: quid habet Cæsar quod possit respondere, si subiiciam illum à pacto fœdere Crecenti, nunquam ad hanc diem de hoc oppido expostulasse? An nesciebat Regi mæcipatū, Regis præsidio teneri? Ille tamen in perpetua Regis amicitia velle perstare simulabat. Vnde ergo tam subita animi mutatio? nisi quòd dum occasionem violâdorum fœderum, turbandæq; pacis quærît, dum incredibili suæ ambitioni seruit, per causam Mirandulæ bellum inchoare instituerit: vt simulato iure Imperii, & nomine Pontificis vsurpato, Regi, cuiusque amicis ea eripiat, quæ iure cum ex induciis, tum ex fœderibus retineri possunt. Age verò, quoniam principes & Imperii clientes qui rebellauerant, in societatem fœderis Crecentis negant venisse: ac proinde exceptum videri Comitem Mirandulanum cõtumacem: non video cur tandē contumacem arguant, nisi fortè quòd Cæsari postulanti, oppidum dedere recusauit: veluti Parmam Octavius, quam sibi à Pontifice traditam clietelæ nomine possidebat.

Quòd si confictis rebellionibus talibus, locus daretur, quæ tandem aut vrbs, aut prouincia intra Imperii fines salua esset, quam Cæsar eadē ratione non sibi assereret? Nā dum ille dominos, tametsi Imperii iudicio sese submitterent, contumaces pro arbitrio fingeret, omnia sui iuris faceret. Quapropter ea pars fœderis, quæ excipit cliētes Imperii cōtumaces, nō pertinet ad illos, quos Cæsar tales pro sua libidine appellauerit: nisi certissimis argumentis eos rebellasse doceat, & eisdem læsæ maiestatis reos, sententiis more maiorum pronuntiatis, esse constet. Quanquam si verba fœderis consideratius expendantur, proculdubio comperiemus rebellium appellatione illos duntaxat contineri, qui reuera Imperatori dictotum nō erant audientes: veluti Ducem Saxonum, Lantgrauium Hesorum, & Germanos alios qui Religionis causa & libertatis per manus à maioribus acceptæ ex composito contra Cæsarem coniurauerant. Quod eò magis probabile est, quòd paulò post id fœdus initum, illis Cæsar bellum intulit. Nihil porrò ad Comitem Mirandulanū pertinere, qui nihil ipse Cæsarem offenderat, nisi fortè quòd oppidū haberet Cæsari accommodatissimum. Caterum, quòd Cæsariani subiiciunt Comitem Galeotum, per insidias Patruum occidisse, ad Regis causam pertinere non arbitror. Tantum dicam, nihilo plus fidei addendū huic accusationi, quàm Galeoti inficiationi.

Nam si facinus tam atrox intercesserat, quis credat mortui hæredes in induciis Nicæis cōsensisse, idque tabulis scriptum & cautū relinqui, ut vsitata iuris ratione de proprietate oppidi, & nō extra ordinem de crimine quereretur? Ex quo iudicari potest, non de cæde, sed de mortui fortunis disceptatum, præsertim cum hæredes Cæsarem tam propitium indicem haberent: cuius tamen sententiam nullam proferre possunt, ac nec decretum quidem: nisi fortè repentino quodam animi impetu factum haud dissimile illius, quo Octavius aduersus Pontificem contumax declaratus est: qui prius quàm in iudicio sistere, aut res suas amicè componere posset, bellum geri in suis finibus sensit. Quæ cum ita sint, non queo fatis mirari, quid Cæsarianos impulerit, ut Regi hoc etiam crimini darent, quòd Mirandulam & Parmam exulum receptacula esse velit: inter quos etiam Strosios Bétuolos & Fregosios referre audent: omnes quidem illos veteribus atque illustribus familiis ortos: quibus hoc tantum obiici potest, quòd Regis partes magis, quàm Cæsaris sequi statuerint: ne videlicet iugum seruitutis subirent, quod hic noster Italiæ pacificator, eorum ceruicibus imponere studebat: nèque in illis locis viuerent, ubi patres, cognatos, & affines omnibus contumeliis vexatos, & per summum scelus trucidatos meminerant: propterea quòd cadentem patriæ libertatem erigere voluif-

sent, & tyrānidi nascēti studia, vires, conatus opposuissent. Qui & ipsi liberi sunt, & in ciuitatibus liberis viuerent, si per Cæsarem liceret. Quo miror magis Cæsarem tam perfricta fronte, Regem exulum receptatorem appellare: idque illi vitio vertere, cū ille nihil vnquam vel in Italia, vel vsquam alibi, terra, marique confecerit, nisi opera non dicam exulum, sed proditorum insignium: eorum qui a suis principibus descuerant: eorum qui contra illos, quibus educationem & honorum accessiones debebant, coniurauerant: eorum qui vrbes suæ fidei traditas, non expectata oppugnatione, sponte hostibus dediderant: classes quibus præfecti erant, flagitiosè abduxerant, exercitus miserè prodiderant: eorum denique qui veneno, non ferro, cuius maleficii palam conuicti sunt, dimicare didicerant: quos iura gentium in impiorum ac sceleratorum numero habent: quos nemo aditu, nemo congressione, nemo sermone dignos iudicaret: hos Cæsar amplexatus est, & summis honoribus auctos exercitibus præfecit. Quorum nomina proferrem, nisi per se satis noti essent: verereturque, ne in re quidem molesta, ac certè non necessaria longior essem: aut retorquendis in Cæsarem criminibus Regem purgare, aut exaggerandis conuitiis veritatem obscurare voluisse existimarer. Sequitur illud quod secundum initio orationis mihi proposui, vt Regis in

Cæsarem officia commemorem, & quemadmodum pacem omni studio retinendam putauerit: ex contrario, quàm in illo suspecta omnia inuenerit, ut neglectius, ut iniuriosius acceptus persæpe fuerit. Cum hæc docuero, tû illud ostendâ, quod maximè requiri intelligo, Regē offensiones omnes suas, publicæ quieti dimittere prius paratum, non potuisse nûc non armis disceptare, ut illatam iniuriam à se suisque arceret. Quæ si omnia dicendo consequi potuero, efficiam profectò, ut omnes intelligant, non fuisse causam cur Cæsar Regis animum alienare aut exulcerare debuerit, quem cōstaret nec vulgarem amicum, nec contemnendum fore inimicum.

Henricus Rex regnum adeptus, comperit illud cum omni ex parte pacatum, tum auri argentique in ærarium à patre, redacti copia abundans, equitatum lōgè post hominum memoriam instructissimum, pedites vèteranos, & longo armorum usu strenuos: sic ut sine auxiliaribus copiis (quanquam & ipse satis multas militum exterorum cohortes alebat) iustum exercitum posset comparare, eumque quocumque collibitum fuisset, ducere. Neque enim Cæsar, qui id temporis in Germania agebat, & non solum curarû mole, sed & morborû grauitate opprimebatur, formidandus erat: Rex verò Anglorum, multò minus, qui impubes regnû paulò antè adeptus, sub tutoribus ac procuratoribus agebat, qui magis de

tuendis,quàm proferendis finibus, quos à maioribus accepisset, laborabât. Rex tamen tot & tantis belli gerendi cōmoditatibus non est vsus, quæ vel iuuenem gloriæ bellicæ cupidum faciliè mouere & incendere poterant: sed memor corû fœderum, quæ inter Franciscum parentem & Cæsarem intercesserant, considerans etiam factiones in Religione Christiana nuper ortas, quæ nisi cōsentitibus inter se Christianorum principibus, sedari non poterât: nihil potius habuit, quàm vt publici boni causa, Cæsarem primo quoq; tempore redderet de sua volûtate certiolem. Declarabat autẽ se fœderibus prioribus stare, tranquillitatem publicam cōseruare, nouis affinitatibus atq; aliis omnibus rationibus honestis hâc amicitiam & societatem confirmare, eamque veluti hæreditariam & perpetuam ad liberos & posteros velle transmittere. Itaque primùm Andeloto vni ex cubiculariis primario: deinde Brissaco, supremi ordinis equiti, & tunc tormentorum bellicorum præfecto, mādاتا dedit ad Cæsarem. Hi cum Cæsare, ciuſq; ministris multa egerunt, sed præcipuè Brissacus de fœderibus, si quid in his esset in quo minus sibi satisfactum Cæsar quereretur. Obtulit præterea nouas nuptiarum affinitates, quas hîc non libet commemorare: quod Cæsar, tametsi rem sibi gratissimam fore simulabat, ad exitum perducere recusauerit. Interea tamen respondit, sibi in animo esse, pacem, quam cum

Rege haberet, sanctissimè colere: orare atq; obtestari Regem, ne quid secus de se existimaret, nihil neque nunc, neque in posterum rerum novarum moliturum. Quod responsum visum est Regi boni consulere: tamen si per facile erat iudicare, Cæsarem magis necessitate præsentis coactum, quàm benevolètia adductum, tam amicè respondisse. Nam Cæsariani, quæ perpetua illorū cōsuetudo, veritatem obtegentes, multa comminiscabantur, eaque in vulgus proferebāt, Regem diffisum suis viribus, & tanti Imperatoris potètiā veritum, eius amicitiam magnopere expetere: ne videlicet Italix reguli (quos Placentia per summū scelus in cæde Petri Ludouici Ducis à Cæsare occupata mirificè sollicitos reddebat) ad liberandam Italiam, ditionesque suas tuendas conspirarent, atque audientes à Cæsarianis Regem Cæsari obsequentem, ac propè supplicantem, animos prorsus dmitteret: præterea ut Germanici principes omnem in posterum spem recuperandæ libertatis abiiceret, quam Cæsar recenti sua victoria nō mediocriter labefactauerat. Attamen Rex qui omnia in meliorem partem accipienda statuebat, promissis iis quæ Cæsar per oratorē suum ostendebat, quæque Regis Legato sæpius repetebat adductus, aliquot peditū Germanorum præfectos, qui prius patri Regi, post sibi meruerant, dimisit, ut illi tanquam pacatissimis temporibus in ciuitates Imperii liberas, domumque se reciperent.

perent . Ea re cognita, Cæsar vt ostenderet aliud
lingua voluere, aliud animo concipere, & quàm
parum fidei esset promissis superioribus adden-
dum, illos omnibus vestigiis indagare curauit, &
comprehensos causa vix cognita, morte multauit.
In his fuit Sebastianus Volgepergius, qui in
Francia iamdiu ordines duxerat, quem (vt ani-
mū planè suum declararet) Augustam vsque, vbi
celeberrimus électorum & principum Germa-
niæ conuentus tum agebatur, vinctum duci cu-
rauit, ac triduo pòst ex fœdissimo carcere ad cru-
dele spectaculum eductum, maxima populi fre-
quétia, æditiore loco ad id in foro parato, homi-
nem iussit obtruncari, addito per carnificem in-
nocentis hominis sanguine aspersum adhuc gla-
dium eductū habentem elogio, quo eūdem omni-
bus exitum Cæsar promittebat, quicumque ex
Germanis stipendia Regis Francorū mererent.
Siquidè & ipse Volgepergius vsque ad extremum
spiritum in eo perseverauit, ac palàm testatum
apud omnes reliquit, nullius facinoris sibi esse
conscium, ac nec scire quidem, quamobrem in
Cæsaris offensionem incurrisset: nisi fortè quòd
decem cohortes peditum Germanorum initio
huius principatus in Galliam duxerat: ex quo iu-
dicari potest quāta fides Cæsari habēda sit, quidue
spei in eius amicitia ponere nos oporteat, qui
nomen Regium & dignitatem nihil moratus,
Regem Francum, parētem, & (vt fingebat) ami-

cum, à cuius maioribus se ortum gloriatur, & quibus præcipua fortunæ ornamenta & accessiones debet, hoc dedecore & ignominia appetere non erubuerit: præsertim præsentibus lectissimis totius Germaniæ principibus, voce carnificis abiectissimi in tam tristi crudelique spectaculo usus. Viderint igitur cæteri principes feliciter nati, quonam pacto Rex magnanimus atque inter Christianos præcipuus, id factum dissimulare potuerit, remque adeò & existimationi aduersam & libertati Germanorum, quos maiores omni memoria coluerunt, & veteres amicos, cõsanguineos & perpetuos socios appellarunt: indignationemque, ex qua summa labe suæ dignitati aspergebatur, tam patienter tulerit. Nam cum ea vox publicè dicta, publicè quoque reuocanda esset, si quidem Cæsar de iniuria satisfacere voluisset, nihil quicquam responsum Regis Legato expostulanti, nisi quòd iniussu Cæsaris tam temerè hic carnifex esset locutus: tametsi Legatus Regis vehementer instaret, ut tam fœda vox in publico dicta, in publico recitaretur: oportere errorem, quem agnoscebant, eodem loco ubi admissus fuerat, deleri. Rex tamen quanquam atroci contumelia laceratus, iracundiam suam dimittere publicæ tranquillitati maluit: eoque magis, quòd Cæsariani astutissimè simulabant, id factum, quod modò cõmemoravi, ægerrimè ferre: nec verò ea mente hunc dolorem præ se ferebant, ut in posterum

amicus cum Rege agerent, sed ut blandæ orationis specie Regem eluderent, & nec opinantem quamprimum eius adoriendi facultatem nanciscerentur, ad extremum opprimerent. Quam quidem cogitationem suam breui perfecissent, nisi huic malo celeriter fuisset occursum. Etenim cum Rex post paulò fœdus paternum cum Heluetiis & Rhetis renouaret, nihil eorum à Cæsare prætermissum est, quæ cōficiendo huic negotio aduersari iudicaret. Nec tamen illius vel pollicita, vel preces, vel minæ, vel munera, quibus nonnullorum animos à Rege abalienare studebat, efficere potuerunt, quin Heluetii Rhetique Regem veterem amicum Cæsari præferrent: quòd satis compertum haberent, illum commoda amicorum spectare: hunc niti, ut eos factionibus & partibus inficeret, quò minori negotio diuisos ad se traheret, ac leges pro arbitrio tandem imponeret. Nimirum hoc erat eius propositum, huc consilia illius spectabant, ut postea res ipsa apertè declarauit. Nam cum Rhétos constaret, loca aspera & sterilia magna ex parte habitare, & ex Insubria frumentum ad illos & salem cæterumque commeatum facilius, quàm aliunde propter propinquitatem importari, Ferdinandus Gonzaga illis omni sua præfectura interdixit, ut rerum necessariarum inopia adducti, à Regis amicitia desciscerent. Quinetiam quosdam à se instructos & subornatos per illorum pagos atque op-

pida dimisit, qui initis conciliabulis plebem in magistratus societatis Francicæ auctores concitarent, & ad defectionem sollicitarent. Cuius rei propositos à se libellos postea agnouerunt: unde seditiones multæ, ac factiones inter illos ortæ, quæ non antè sedari potuerunt, quàm rudiores à peritioribus, & inferiores à magistratibus edocti ad sanitatem redierunt. Sed ad reliqua pergamus. Cùm Rex audisset Scotorum Reginam viduam matrem eius pupillæ, ad quam regnum iure pertinet, nonnullorum eius gentis procerum factione penè oppressam, videlicet maiorem iam eius regni parte factionis opera in potestatem hostium redacta, huic laboranti auxilia peditum atque equitum mittere decreuerat. In illas enim angustias fœminam compulerant, ut vndique cincta periculis, quanquam sit maximi animi summæque prudentiæ, haud tamen sine Regis ope, quam implorabat, vnquam se explicare potuisset. Eo tempore Cæsar classi Regiæ, quæ ad auxiliares copias ferēdas comparata erat, omnes aditus ad portus suos interclusit, causatus nihil tuti in his esse. Ita putabat Regem de suscepto consilio deduci posse: maximè propter difficultatem nauigandi, cùm illinc Anglos, hinc Cæsarem tam suspectum amicum haberet. Quod etiam ex his, quæ post acciderunt, magis intellectum est. Nam cùm bellum gereret cum Anglorum Rege pro recipienda Bononia, quæ su-

periore bello amissa fuerat, etsi Cæsar neutrum eorum contra alterum iuuare deberet, atque ita se facturum legatis Regiis recepisset: tamen omnibus rebus ad bellum necessariis hostes iuuare voluit, multas peditum cohortes, equitum turmas ex superiore inferioréque Germania per suos agros ad Anglos liberè transire. Præterea suos Anglorum nomine in finibus regni latrocinari, nostros spoliare, excruciare & trucidare, nonnunquam etiam ad viginti milia passuum in Franciam excurrere, pecus abigere, atque hostilia plurima in Gallos exercere permisit: sicuti quaestionibus de ea re habitis euictum est, præcipuè ex suppliciis illorù qui Hisdini cum ob alia atrocissima crimina, quorum conuicti sunt: tum quòd confiterètur se suburbia eius vrbs inflammare consensisse, laqueo publicè vitam finierunt. In quibus aliquot reperti sunt ex militibus, quos Cæsar in præsidiis Artesiorum & Annonum locauerat. Quod si quando palàm præco iussu Cæsaris prædicarit, nulli ex suis licere sub Anglis merere, id ex industria fiebat, partim vt videretur aliquid indulgere legatis Regis de eo sæpius apud se conquestis: partim vt Franci hoc publico edicto cõfissi, minus sibi cauèrent, & nihil hostile metuentes, facilius ex occulto atque ex insidiis vel spoliarentur, vel interficerètur. Etenim Anglis tantum militum, quantum volebant, licitum erat in ipsius ditionibus colligere: nõ quòd illis ex ani-

mo bene vellet, sed magis adeò vt diutius Regi
resisterent, ac demum inter vtrosque bellū lon-
gius protraheretur, & interim se otiosum specta-
torem miseriarum & calamitatum alienarū præ-
beret. Quod cum Angli animaduertenterent, vt ho-
minem tam læto spectaculo priuarent, animum
ad pacem appulerunt : ad quam propensum Re-
gem sua sponte inuenerunt : eoque magis, quòd
is non bellabat, vt per vim aliena occuparet, sed
vt sua quæ fuerāt erepta recuperaret. Pace cū An-
glis facta (quod accidit sub initiū anni M. D. L.)
videbatur potestas Regi data auertendi Cæsaris à
Germania, in quam necesse reuerti habebat: at-
que ita Cæsarem, à quo toties lacesitus fuerat,
vliciscēdi, & res eius, quæ tunc erant secunda, pe-
nititus interturbandi. Habebat ad eam rem multa
militum exercitatorum in armis milia, quæ bel-
lo Anglico feliciter confecto, simul collecta in
finibus Picardorum & Artesiorū sub signis age-
bant. Verū tantū abest, ne Rex armis iniurias
persequi voluerit, aut occasionē oblatam capta-
re, aut commoditate ad bellum gerendum præ-
sentissima vti, vt mercenarios externos dimisc-
rit, veteranorum cohortes imminuerit, consilia
cum Cæsare communicauerit: atque omnia quæ
ad tranquillitatem reip. Christianæ retinendam
pertinebant, tētarit atque procurarit. Itaque non
cōtentus Legato ordinario, quem apud Cæsarem
habebat: alterum quoque ad Reginam Hunga-

riæ Cæſaris ſororem miſit, priuatorum expoſtulationes audiuit, iudices pluribus in locis conſtituit, qui de controuerſiis ex nauigatione ortis, ſumma celeritate cognoscerent. Præterea mandauit aliquot equitibus ac peditibus, vt Lincantiæ arcem munitiſſimam, & inferendo Cæſariæ damno admodum opportunam, quæ abhinc duodecim annos ad Arduennam ſiluam exædifcata erat, caperent atque euerterent. Cauſa eius euerendæ fuit, quòd hi qui præſidio locum tenebant, mercatores magnis incommodis afficiebant, ſed maximè eos, qui ex Cæſaris ditio-
ne in Germaniam contendebant. Quam quidem arcem Cæſar ipſe paulò antè centum millibus nummum aureorum perlibenter redemiſſet, propterea quòd omnem illam vicinitatē latrociniiſ & excuſſionibus infeſtā reddi animadu-
uerterat. Ad hæc cōſtituit de finibus arbitros, qui lites & controuerſias propter conſinia excitatas componerent. Poſtremò, omnia quàm diligentiffimè curauit, quæ ad ſecuritatem ſubiectorum vtrique populorū pertinebant, vt cōmerciis locus eſſet, & vtrò citròque liberè poſſent cōmeare, remotis omnibus obſtaculis, quæ hanc Chriſtiani orbis quietem vel interpellare, vel labefactare poterant, quam omnibus modis Rex confirmare ac ſtabilire maximopere cupiebat. Sed Cæſar vel quòd Regi, quem toties offenderat, diſfideret: aut quòd cum (vt ſæpe declarauerat) odiſ-

set: aut quòd elatus cupiditate amplificandæ potentix semper ex aliena imminutione crescere cuperet, nondum vertente anno, qui fuit M. D. LI. sed potissimum appetente vere, omnia continuo mutauit. Nam Regina soror res omnes ad bellum necessarias palàm comparare, perinde ac si hostes in armis videret, equos & carros ad comportandum còmeatum, & vehenda tormenta bellica edicto cogere, oppida finibus nostris viciniora, maioribus præfidiis firmare, delectus equitum & peditum in Gueldria, aliisque locis habere, classem in Oceano satis magnam instruere, eamque ad oram Bononiensem dimittere: postremò eorum nihil omittere, quæ bello iamiam aperto fieri solent. Cùmque rogaretur quidnam moliretur, aut quid sibi vellet hic tantus apparatus, id solum respondebat, hæc omnia à se prouisa & deliberata, ne quid nouaretur: tametsi quæ consecuta sunt, facile declararunt res verbis minimè consensisse. Nam tota illa classis ad fretum Calerantum substitit, expectatura dum Sanctandreas Marefchallus illac transfret, quem audiuerant in Angliam propediem nauigaturum, vt insignia ordinis cochleati ad Regem Anglorum ferret, qui in id collegium cooptabatur. Etenim ne eo loci proficisceretur, & Reges mutuam amicitiam, recipiendis vltro citroque ordinum vtriusque gentis insignibus, confirmarent, decretum erat impedire. Quod vbi Sanctandreas animaduertit,
& quem-

& quemadmodum mercatores illàc nauigantes
Cæsariani iniuriosius tractarēt, alios perscrutan-
tes (vt dubiis temporibus fieri assolet) alios expi-
lantes: his modò anchoras & antennas, illis vina,
panes biscoctos, & reliquum commeatum nau-
ticum, cuius indigebant, eripientes: denique ne-
minem sine aliquo illato damno præterire si-
nentes, ne in id periculum ac discrimen proxi-
mum veniret (quippe non aliam ob causam,
quàm vt suum aduentū præstolarentur, illic sub-
stitisse videbantur) statuit aliquot Flandrorum
naues, quæ Dieppæ in falo stabant, duos aut tres
dies ad summum retinere, tantisper dum in An-
gliam alià perueniret, quàm quæ sibi erāt insidiæ
paratæ. Quam ad rem tanta moderatio adhibita
est, vt nec nauarchi, nec nautæ, aut vectores vl-
lam iniuriam aut detrimentum acceperint.

Quinetiam statim vt auditum est Sanctandream
ad litus Angliæ appulsum, hæ naues inoffensæ
ac liberæ dimissæ sunt. Sed Regina, quæ ad bellum
omni studio incumberebat, priusquam huius facti
consilium intelligeret, aut nihil tale fieri in reli-
qua ora maritima Franciæ rescire potuisset, pro
tribus nauiculis, quæ duos aut tres dies ad sum-
mum retentæ fuerant, in omnes omnium Fran-
corū naues, quas in Germania inferiore nancisci
potuit, manum iniecit, vela & reliquum appa-
ratum nauticum detraxit, merces in terram expo-
nere iussit, nautas & vectores (quorum magnus

erat numerus) expensis exhaustis. Nec aliud crebris eorum postularis responsum, nisi quod par pari redderet, suorum naues in Francia prius retentas, quas tamen dimissas iam constabat: neque id in omni ora Franciæ factum esse, sed tantummodo Dieppæ, idque iustissimâ ob causam: cum ex contrario ubique, & sine causa in omnes promiscuè id exemplum acerbum atque intolerandum statuisset. Quinetiâ parem animaduersionis seueritatem aduersus illos qui Antuerpiæ negotiabantur, adhibuit: quanquã nihil cõmune cum maritimis haberent. Enimuero non solum merces, quas in carris pro consuetudine eius regionis vehabant, retinuit, sed etiam cætera Francorum bona ubique conquiri & notari iussit: proinde, quasi nihil superesset, nisi de miserorum fortunis impunè prædari. Eodem tempore quinque iuuenes Franci & literati, honesto inter suos loco nati, peragrata Germania superiore: ut qui ad diuersas gentes adire, & mores ritusque hominum varios cognoscere cupiebant, iter in Franciam per Germaniam inferiorem habentes, comprehensi sunt, & in custodiam Hayæ Hollandorû traditi, exinde Bruxellas veluti rei nocentes ducti. Cùmque illos indignius habitos legatus Regius quereretur, idque contra fœdera & fidẽ publicam factum expostularet, parum tamen profecit: sed nec cur comprehensi fuissent, intelligere potuit. Tãtùm summus Regiæ cõsiliarius pronuntiauit iustam ob cau-

fam, quā tamen inexplicatam reliquit, cōprehen-
sos fuisse: hoc addito, vt quanta maxima possent
celeritate ex illis finibus excederēt, nec à via præ-
scripta defleſſerent. Scilicet ita consueuerūt in-
iurias, quas aliis nulla de causa inferunt, prætex-
re, sententias nullis actis antecédētibz dicere: &
illis viā, qui ad se velut ad pacatos amicos vene-
rant, præscribere: cōque magis mirandum, quòd
ab Augusta quales essent, & qua via ad suos reuer-
terētur, scire poterāt ex literis Episcopi Atreba-
tēsis, qui est in intimis Cæsaris familiaribus, quo
cum Legatus Regius de his sermonē fecerat. Eo-
dē tēpore comes Reuxius (quē omnes de nomine
fatis nouerūt, & ex eo maximē, quòd nūquam ni-
si cum Francos insigni aliquo malo afficit, quid-
quam, quod operæpretiū sit, se facere arbitratur)
Villebonum Theroennæ Morinorū præfectum
commeatu, quem ex propinquieribus locis, atq;
ex ciuiū redditibus in urbē subuehebat, interclu-
dere conatus est. Nam & carros quosdam onustos
frumēto interceptit, & erat grauiora factururus, nisi
eius conatibus maturrimē fuisset occursum. O-
mitto insolentiam hominum atque fastidium:
omitto minas & terrores, quos nostris propone-
bant. Quæ cum aliena nō essent ab eo apparatu,
quem modò commemorauī, & Rex animadu-
eretur, multa diuersis in locis aduersus suos hosti-
liter fieri, sibi tandē consideratius prospiciendum
duxit. Itaque postquam animaduertit, nec mer-

catorū naues restitui, nec damna suorū refarciri, nihil concedi his, quæ primarii sui ministri à Legato Cæsaris postulabant, à Regina Hungariæ preces, quas legatus Regius proponebat, nō audiri: quin potius vana tergiuersatione illudi, ne inermis & incautus opprimeretur, aliquot naues in Oceano ad omnem euentum expediri, & classē in mari interno parari mādauit, quò subitas hostium incursiones remoraretur, & res prius per summam iniquitatem ereptas, si nō restituerentur, armis repeteret. Tandem cū allatum esset Parinam in Italia obsideri, & à Ferdinando Gonzaga bellū ad Mirandulam apertè ac palàm geri, & post assiduas diurnasque exostulationes ex nauibus ac fortunis suorū, ferè dimidio minus in Flandria redditum, non depensam sumptuum æstimationē, non habitā rationem, quanti pluri mi illorum interfuerat merces non fuisse retentas, quod dimidio pluris constabat: nullam denique pacis expectationem relinqui: vtrique classī liberius agere permisit, veteranis etiam militibus qui in præsidiis Pedemontanis collocati erant, mādauit, ne se à Cæsarianis circumueniri paterentur: quin & virtutis pristinæ & fidei datæ memores, eius dignitatē, existimationēq; ab inimicis defenderent, & vt orto à Cæsare bello, recentes iniurias propulsarent & vlciscerentur. Dimisit humaniter Legatū Cæsaris, exposita prius, cur ad arma res deducta esset, ratione: vt videlicet se,

suosq; focios & amicos tueretur. Suos insuper legatos reuocauit, qui in comitatu Cæsaris & Regine sororis agebant, nimirum eorum legatione bello aperto finita. Verum enim uero Regina illum, qui apud se agebat, retinuit, & apud veterem nescio quam arcem in custodiam tradidit, ubi dies amplius viginti comoratus est: rem prorsus indignam quam à Regina Regio legato fieret. Nam tamen Cæsaris orator humanissime dimissus erat, ac iam in inferiorem Germaniam peruenerat, Regius tamen in eo quem dixi loco retinebatur, ut orbi terrarum restatius fieret, non solum Cæsarem contra fidem, contra dignitatem, contra foedera bellum inchoasse, sed etiam eius sororem, legatos qui semper sancti fuerunt & incolumes, vel inter hostium tela versari potuerunt, contra ius gentium violasse. Quam quidem indignitatem verbis pluribus exaggerarem, nisi id Cæsari usitatum viderem. Nam si his, qui legatos nostros ex insidiis aliquando crudelissime trucidauerunt, impunitatem dedit: quid sperandum in causa illorum qui in carcerem tantummodo missi essent? Quibus hoc solum, quod liberati sunt, magnum beneficium fuisse datum videtur, nulla insuper satisfactio oblata: exemplo latronum, qui cum viatores expilant, sibi videtur vitam, cum in eorum manu posita esset, illis dedisse, quibus non ademerunt. Quanquam verò Cæsar hanc prauæ voluntatis significationem, & cætera sua iniqui-

tatis documēta sæpius edidit:tamen miror Cæsarianos vafre & malitiosè(vt solēt multa comminisci) suadere Germanis, & reliquis Christianis, Regi nō licere sanctissima illa Cæsaris cogitata ad cōponendas Religionis controuersias, & ad propulsandos à Christianorū finibus Turcas spectantia inturbare. Quæ fortassis rudioribus persuadere possunt, metientibus Cæsaris animū ex tot sanctimonix titulis, quos ambitiosè architectantur:cū illum modò defensorem Ecclesiæ, modò libertatis parentem, modò iustitiæ & æquitatis patronum obseruantissimū appellāt: dūmque omnia eorum scripta, omnes conuentus, omnia loca, ad quæ adeunt, huiuscemodi vocibus personant:his enim quasi velis obtegere interiora animi vitia conātur. Verūm(gratia superis)lux tandem veritatis hanc imposturarū caliginē dispulit, & fictam personam, quam induerat, vt omnibus illuderet, detraxit. Nā quæ antehac in Cæsare Religio putabatur, nūc habetur pietatis simulatio, qua etiam hominibus imponere conatur, dum existimat illos insidiosissima ministrorum suorum oratione, & simulatione grauissimæ personæ, quam ad hanc diem callidissimè sustinuit, captos perpetuis tenebris versari. At compertum habemus, eos piorum numero non esse habendos qui præloquuntur, sed qui faciunt:nec qui simulant, sed qui bene beatèque viuendo sanctitatem, quam præ se ferunt, actionibus exprimunt

& declarant. Vidimus Cæsarem bellum in Germania graue & luctuosum excitasse, eo nomine, (quemadmodum ipse prædicabat) vt Protestantes, qui à Pontifice iura non acciperent, in potestatem Ecclesiæ Romanæ redigeret. Quapropter à Paulo tertio Pontifice magna peditum atque equitum auxilia impetrauerat. Postquam vero optata consecutus, nihil amplius à Pontifice expectare habuit, confestim edicto promulgato declarauit, se bellum in Germania non suscepisse Religionis ergò, sed vt quos dicto nõ esse audientes increpabat, armis castigaret. Etenim re vera Germanis, qui secum militabãt, concessit, vt more suo viuerent, lingua patria psalmos Dauidicos canerent, eiusdem dogmatis concionatores audirent, & alia quamplurima, quæ ab Ecclesiæ Romanæ ritibus sunt prorsus aliena. Præterea, dum numerosissimū illum exercitum ad horum contumacium oppida duceret, si quādo de deditioe agerent, de mutāda Religione verbum nullum. Quæ res maximam mouit admirationē Episcopis & Cardinalibus Germanis, qui in eo exercitu erant, quique arbitrabantur, hoc bellum à Cæsare susceptum, vt cæteros in potestatem Ecclesiæ reuocaret, cum re ipsa demum subodorarentur id fuisse propositum Cæsari, vt corporibus, non animis imperaret. Quod & ille aliàs sæpe significauit, sed tum maximè, cum Argentinæ, Vlmæ, Augustæ, & reliquarum Imperii ciuitatum lega-

ti de recôciliatione agerent. Tantùm enim abest, ne quicquam de eorum institutis immutari postulare, vt disertè in pactionibus additum sit, nihil in Religione nouatũ iri. Itaque Cæsar Augustam profectus, Protestantes suis vti moribus voluit, cõcionatores reliquit, præsertim in victoria recenti, & tum, cùm oportebat re declarare in quem exitum tãtum bellum suscepisset. Quo facto adeò est offensus sacerdos arcanorum Cæsaris conscius, vt illi petenti veniam negauerit, atq; alius à quo expiaretur, quærendus fuerit. Quamquam vt Ecclesiasticis aliqua ex parte satisfaceret, & ne penitus afflictos & demissos videret, statuit in quibusdam templis sacra missarum Romano more peragi. Hoc verò non erat aliud, quàm animos hominum magis ac magis indies partibus inficere, quàm seditiosam in populo & luctuosam vitam perpetuò alere. Nam si multitudo inter se dissidēs eorundem mœnium complexu agrè potest sine tumultu diutius coerceri & cõtineri, quantò magis id expectandum est, cùm in Religione omnes vna mente ciues non cõsentiunt? Nulla est enim dissensio maior, nulla diiudicatio acrior, quàm Religionis, in qua pars alterutra spem vitæ beatæ & immortalis collocat. Quod Cæsar cùm astutè præiuderet, atque hâc viam alendæ seditionis inter Germanos perpetuæ videret suis rationibus accõmodatiorem, (facilius enim erat discordes, quàm cõcordes domare)

mare) consiliū iniit de proponēdo nouo dogmate, quod Principes atque Electores Imperii vt legem à victore acceperūt. Hæc verò doctrina constat partim ex Protestantium decretis, partim ex veteribus atque vsitatis Ecclesiæ institutis. Quam interim statuit obseruari, dum cōuocato omniū Christianorum concilio, de his controuerſis decideretur: ac propterea doctrina Interiana est appellata: vnde tres in Germania sectæ esse cœperunt, Catholicorum, Protestantium, & Interianorum: ex quibus quarta occultè conſtabatur eorum, quos *athéus* rectè nominare possumus. Siquidē rudis & ignara plebecula, cū videt Religionem variis opinionum procellis ac fluctibus æstuantem, & præcipua doctrinæ Christianæ capita hinc probari, illinc improbari, primum in summa rerū hæsitare, mox omnē Religionem, vt hominum commentum exuere cogitat. Ita hic præclarus Religionis amplificator Cæsar, dū Germanos ad Ecclesiam Romanam reuocare conaretur, doctrinā proposuit: quæ cū damnata est Romæ, & in omnibus prouinciis, quæ Pontifici Romano obtemperant, tum à Protestantibus mirandum in modum improbata. Libenter igitur à Cæsarianis quærerem, qua demū auctoritate id fecerit. An cōsensum & suffragationem Pōtificis proferent? At hic maximus natu filius, in eo parentis sui auctoritatem minuit. Cui bono id Germanis fuisse dicēt? At semper de omni-

bus his controuersiis ad concilium referendum
putauerūt. Præstat scilicet, vt credamus illum ar-
bitrum inter has duas sectas à Deo Opti. Max.
datum; & tanquam angelum ad nos è cælo de-
missum, habere potestatem noui dogmatis insti-
tuendi; quod aduersetur priscorum patrum con-
ciliis, quorum hic, non Pontifex, sit moderator.
An potius, quod verisimilius est, id secum com-
mentatus est, vt magis ac magis hominum ani-
mos peruerteret, & vehementius indies Germa-
niam turbaret? Hæc nimirum spectât, vt Catho-
lici quod imperatum erit faciât, dum horum par-
tes se fouere simulat: & à Protestâtibus impetret
quodcunque voluerit, dum illos sinat suo more
vivere: nouosq; suos Interianos vt rectius sentiē-
tes nunc Catholicis opponat, nūc in Protestâtes
armet & acuat: atque ita omnes mutuis inter se
odiis excitati, nihil sibi negare consuecant: & de-
mum exhaustis vtrisque & exanguibus, domi-
natiomen in Germania, & tyrannidem sibi opta-
tam, aliis detestâdam constituat. Quorsum enim
pertinet huius Interinarix doctrinæ propagatio,
seges ac materia omnium discordiarum? Quor-
sum illa acerbissima pecuniarū exactio, qua erga
Catholicos vsus est, qui licet superioris belli Ger-
manici onera sustinuerint, illis tamen propè du-
riorē nūc se præbet, quàm antehac præbuit Prote-
stâtibus, cū de recôciliatione agerēt? Cur tãram
multitudinē tormentorū bellicorū à Germania

aliò abduxit, nisi vt vrbes viribus inferiores essent, minúsque de libertate retinenda cogitarent? Cur in superioribus comitiis ab ordinibus Imperii tantam pecuniã exegit, qua bellũ iis, quos ipse suo arbitratu & sua voluntate cõtumaces finxerat, inferret? Cur porro adducti sunt, vt imperata facerent hi, quod verebãtur, ne in eius offensionem incurrerent, illi ne iniuriam acciperet, alii vt molestiã & calamitatẽ redimeret? Cur denique omnes cupiditati sui Imperatoris suppeditarũt, quem toto animo incumbere ad euertendam suam libertatem videbant? An non satis intellexerunt, quã raptim atque turbatẽ de illorum rebellionẽ cognouerit, statuerit, iudicari? vt publica pecunia, quæ ad nouos & subitos casus communium temporum, indicta, coacta, & reposita asseruabatur, in vnius vrbis, id est Madeburgi obsidionem impensa sit: propterea quòd Madeburgẽses non acciperent condiciones ab illo latus, nec (inopiã fortassis impediti) pecuniam imperatam conferrent? Quippe qui sæpius testificati fuissent, se omnibus in rebus Cæsaris dicto audientes fore, excepta sola Religionis causa, de qua ad proximũ cõcilium referebant. Et tamen visum est Cæsari, vires Imperii in illos potius conuertere, qui nihil offenderant, & ex quibus parũ, aut nihil omnino boni ad rem communem Imperii redibat, quã suppetias Regi Romanorũ ferre: cuius fines Turcæ assiduís & quotidianis excursionibus inuadunt,

multos mortales cum pecore atque alia præda capiunt, ædificia incendunt, agros populantur, omnia cruore & luctu hostiliter miscent: atque ita sibi in Germaniam viam muniunt, in quam penetrare quodcumque libitum fuerit, facilius possint. Interea clementissimus Cæsar, qui consilia omnia sua ad salutem Germaniæ spectare prædicat, omnes nervos ingenii & industriæ in eo intendit, ut Germanos à Francis alienet. Sic enim statuit fore, ut illi inter se dissidentes, exhausti pecuniis, tormentis bellicis spoliati, amicis orbat, facilius ab Hispanis vexentur, excrucietur, expilentur: nec quisquam inveniatur, qui reclamare, aut omnino hiscere audeat: tamen si patriam miserè conculcari, cuiusque libertatem foedè proteri videat. Postremo, ut omni spe meliore præcisa, sinant Imperium transferri à Germanis ad Hispanos, quos præ cæteris omnibus gentibus plurimum ipsorum merito diligunt. Atque ubi Turcæ id, quod in Transilvania & Hungaria moliuntur, confecerint, videlicet ut illinc Regem Romanorum depellant, & Cæsar illi eripuerit Imperium, ut in filium transferat, Germania demum & Turcarum prædæ, & Hispanorum libidini exponatur. Cur enim Regina Hungariæ his postremis comitiis Augustanis ultro citroque à Germania inferiore in superiorem toties commebat, nisi ut facilitate Regis Romanorum fratris sui abuteretur, & suis precibus illum induceret, ut de-

signatus

signatus Imperii successor, propè parta imperii dignitate Cæsaris filio cederet : Cur Regem Bohemiæ Cæsar ab vltima vsque Hispania, ad se accersiuit, nisi vt in id consentiret, quod pater eo absente & inuito admittere recusabat? Quidnam aliud causæ fuit, cur Regi Bohemiæ Cæsar adeò infensus, vt vix æquis oculis patruus idem & socrer nepotem & generum aspiceret, nisi quòd eam rem gratam non habuit, nec sperato bono se penitus priuari passus est? Cur Electores Imperii, exceptis duobus Ecclesiasticis, ad illa comitia vocati non venerunt, nisi quòd Cæsarem suspicabantur, hanc Imperii translationem meditari, quam negare absentes, quàm præsentem propter magnam in illum obseruantiam malebant? Denique, cur adeò Cæsar institit, vt concilium congeretur, nisi vt id, quod à Germanis non poterat, à Pontifice obtineret: qui suffragantibus Episcopis Hispanis, quorù Trideti magnus est numerus, bullam aureâ immutaret, & eligendi Imperatoris nouum præscriptû daret, vt pro vno Imperatore, & vno Imperii consorte, duo Imperatores deligerentur? Nam si Cæsar in cõuocando concilio id solùm spectabat, vt cõtrouersix Religionis componerentur, & rerum Ecclesiasticarum esset patronus tam diligens, quàm vult videri, profectò non alienissimo tempore ad arma venisset, & tum, cùm minimè omnium Reip. Christianæ conducebat: Neque tam leui ex causa sibi cum

Rege belládum duxisset, qui vim nunquam, sed pacem semper quæsiuit: & nihil minus voluit, quàm armis de iure publico disceptare. Sed Cæsar, vt se culpa liberet, rem omnē in nomen Pontificis refert, cui iubenti auxilium miserit: id verò non est aliud, nisi palàm profiteri & prædicare: Equidē cupio cōcilium conuocari, vt dū illic de Religione disputabitur, intèrim id quod molior de Imperio, obtinere possim. Maximopere Parmā expeto, vt Placētia recepta tutius potiri, & tyrānidem in Italia institutā stabilire liceat, atque confirmare. Priusquam Franci meas cogitationes labefactent aut conuellant, volo turbare Christianos, armare in Francos Pótificem, meas cū illo copias iūgere, potētiam Regis imminuere, qui mihi solus obsistere, meósque conatus cohibere potest: quorū hæc est summa, vt me Europæ Imperatorem dominúmque constituam: vt familiam meam efferam & illustrem: ac deinde hoc tātum Imperium tam fœliciter partum, posteris meis hæreditariū relinquam. Sed quia fortassis vires meæ debiliores sunt, prætexā Religionem: procurabo concilium transferendi Imperii causa: testificabor me obsequentem Pontifici, vt ipsius ope adiutus, minore negotio Frácos debellem: póst illum solum adoriar, qui non impediet quominus iterum Romā capiam, expilé, diripiā: quin eū in custodiā includā, possessiones eius ac ditiones vsurpē, quòd sacerdotes deceat diuina,

& non humana curare. Id verò perficere admodum difficile non erit, cum iam Italia maiorem partem mihi adiunxerim: illinc Neapolitanum ac Siculum regnum, illinc dimidiam Longobardiam obtinens: quanuis ea conditione ac lege vtrunque regnum possidendum acceperim, vt in Longobardia fines non proferrem, sed intra illos me continerem, qui essent ante occupatam Placentiam præscripti. Dux Florentiæ meas partes sequi vel amore, vel metu cogetur, ad continendum Põtificem longè efficacissimus. Arx Senensis multum promota est, qua tanquam vallo possessiones Ecclesiasticæ intersepientur. Quinctiam præter ducatum Meliolanensem, quem ego Francis eripui, quanuis beneficio Maximiliani Cæsaris aui mei, & iure hæreditario ad illos pertineat, Genua & Luca nutus meos obseruant: meis præfidiis multæ vrbes Pedemontanæ teneantur, quas duci Sabaudæ, cum libitum erit, restituam, vel alias earum loco dabo. Ac ne Franci quicquam illic negotii facessant, fortassis retinebo, quod de Nicæa aliquando tentavi. Ita vniuersam Italiam pacatam continebo, debilitatis cæteris principibus, modò Regem coërcere & domare primum possim: illum ego Pontificis decretis aduersari incusabo, dū contumaces istos tueretur: iura etiam Imperii dicam imminuere, quòd in fidem, Comitum Mirandulanum acceperit, qui idcirco proditor est, quòd oppidum mihi sane quàm accom-

modatum dedere noluit. Præterea, Regem partem Pedemontanæ regionis per summam iniuriam occupare contendam : quanquam iuris ac ditionis comitum Prouinciæ semper fuit, eoque nomine ad illum pertineat. Atq; ne color desit, concilii iudicio cõdemnandum curabo, vt post-hac executione eius sententiæ mihi mandata, per causam concilii arma Regi inferre possim. Postremo, dicam Regis accitu Turcarum gentem, nuper in Christianos impressione fecisse: quanuis ego ipsos in Occidentem euocarim duabus à Drogutio ablatiis vrbibus, Africa & Monasterio: & tamen omnem horum malorum culpam in Regem vnum transferam. Quin omnium dissidiorum, quæ in Germania nata sunt, & nascentur, authorem esse cõtendam : licet ego illa suscitarem, incenderim, aluerim, ac crescendi materiam subministrauerim, vt illis postea ad amplificandam meam potentiam abuterer. Habes (lector candide) causas quæ Regem à Cæsare tanto opere alienarunt, sic vt ægerrime videatur in gratiam redituri, quod alter ambitioni & incredibili dominandi cupiditati nunquam modum statuet: alter sibi non ferendum putat, vt hostis læsa sua existimatione, euerfis amicis & sociis, fœderibus violatis, crescat. Quamobrem, nemini mirum debet videri, si Cæsar neglecto Ferdinando fratre, cui iure naturæ, & societate Imperii suppetias ferre debet, Turcas in Christianorum fines longius indices excurrere

currere finit, cum id vnū sit illi maximè propo-
situm, vt Regem euertat, qui solus potest suas co-
gitationes labefactare, conatus comprimere, cō
tantum spectantes, vt dominatum & tyrānidem
in Christianos omnes exerceat. Quapropter, vt
tandem aliquando finem dicendi faciam, si Rex
arma cepit, expediendæ suæ salutis causa cepit: &
vt bellum cum Cæsare gereret, quod sibi non so-
lum honestum esset, quoniam in eo fortunæ so-
ciorum & amicorum, qui ad se confugerunt, qui-
que nihil Cæsarem offenderunt, aguntur: sed et-
iam necessarium, cum pro aris & focis, nedum
pro gloria sibi certandum videt. Si Rex Parmæ
propugnationē suscepit, eo animo suscepit (quē-
admodum toties declarauit) ne ab Ecclesia Ro-
mana auferretur: quod factum de Placētia nuper
vidimus. Si Mirandulæ obsidio Regem malè ha-
bet, iure id quidē, quod ad se ex induciis Nicæis,
quæ sequentibus fœderibus cōfirmatæ sunt, per-
tineat. Non enim id oppidum sibi asserere Cæsar
potest, nisi forsitan idē iuris statuatur in Comitum
Mirandulanū, quo illum in cæteros vti videmus,
qui sua prodigere, atque ex arbitrio eius perdere
nolunt. Si naues Flandrorum aliquot in Ocea-
no interceptæ sunt, Cæsar fuit in causa, qui bel-
lum prius intulit, quàm indixit: & Regis milites
qui per fines Mediolanēsum sine maleficio, atq;
adeo sine vllō metu transibant, trucidari: qui Mi-
randulam circumuallari, Cōcordiam expilari, at-

que incendi iussit : tamen si Rex prius significasset, sibi esse in animo non minore cura Mirandulam seruare, quàm reliquas patriæ auitæq; hæreditatis vrbes. Denique, nihil prius à Rege nouatû, quàm suorû naues atq; merces in Germania inferiore retetas audiuit, quàmque alia facinora bello aperto trita & vsitata patrari cognouit. Si Andreas Auria, bis haud ita lōgo interuallo ad oram Ligusticam fugatus est, id ipsius uerordia accidit, & quod verebatur, ne si cum classe Marsiliensi sibi decertandum esset, tandem restituere cogeretur triremes, quas aliquando contra fidem & sacramentum militiæ, à Francisco Rege abduxerat. Si Chieriû & fanû Damiani cum aliquot aliis arcibus & castellis apud Pedemōtanos Brissacus caput, Ferdināus Gonzaga de se queri debet, qui prius Parmā & Mirādulam, quas nondum potuit expugnare, oppugnauerit: non Brissacum accusare, quem cū sciret & prælio strenuum & bonum cōsilio, ad id faciendum incendere non debuit. Si classis Turcica ætate superiore ad Christianorû fines appulit, id euenit ex eo, quod Turcarum Imperator fidem à Cæsare violatam diceret : ut facillè iudicari potest cū ex his quæ gesta sunt, tum ex ipsius classis reditu: nomen certè Regis Franci nunquam interuenit. Si Regi Romanorû res in Transilvania non ex sententia succedunt, si multa præter meritû illi patitur, omnis culpa est in Cæsarem fratrem reiicientem.

da, qui amicos hostibus opponit, quos in periculis deferat. Denique, quòd Turcam tantū hostem, tamque formidolosum vtrique Pannoniæ incubare videmus, Cæsar solus est in causa, qui Christianorum concordiam & pacem semper interturbauit: nec putauit nimiam suam cupiditatem atq; ambitionem, nisi ruina omniū expleri posse. Quapropter, cum Rex vires suas non ignoraret, cum recordaretur quibus maioribus sit ortus, & secū animo reputaret gloriam, quā ab illis cum magnā in rebus omnibus, tū summā in re militaria accepit: locum quem in republ. Christiana obtineret, cognomentū quo auctus esset, nec solum præsentī laudi, sed memoriæ posteritatis seruiendum duceret, totus & mēte & animo in bellum insistere coactus est: vt se ab eo hoste defenderet, qui existimat omnia sibi licere quæ potest, & posse quæ animo concipit. Qui reliquos principes præ se contemnit, offendit omnes, nullum diligit. Qui omnibus modis conatur alienare à Rege Germanos veteres amicos, cōsanguineos & perpetuos socios: vt postquam illos ab amicitia & societate eius abduxerit, qui nihil spectat præter illorum decus & commoda, post minore negotio Germaniæ libertatem labefactet. Qui sub specie Religionis & iustitiæ omnibus egregiè imposuit, vt omnes suæ cupiditati obsequētiore haberet. Qui inimicitias inter principes serit & nectit, vt diuisos adortus facilius opprimat. Qui

ad defectionē sollicitat clientes & ministros a mi-
corum, & contra illos coniurare inducit, quibus
sacramento obligabantur. Qui turbat pacem pu-
blicam, violat fœdera, amicorum dignitatem in-
fringit, omnem honestatē proterit atque concul-
cat. Qui queritur Turcas sibi bellum inferre, & is
infert Christianis. Qui Rēgem societatis Turci-
cæ insinuat, quam ipse stipendio depenso redi-
mit: ac post, cum è re sua videtur, dirimit. Postre-
mò, cui omnes libertatis retinēdæ cupidi, & tran-
quillitatis publicæ amantes, arma inferre debent,
ut nimiam eius ambitionem coerceāt atque re-
frānēt. Sed Rex multo iustius, qui est ab eo pro-
uocatus & laceffit: præsertim cum in hoc bello
agatur salus sociorum atque amicorum, agatur
libertas communis: pro quibus optimus quisque
vitam profundere, nedū fortunas periclitari ho-
nestum putat.

F I N I S.

